

REGIONAL NEWS

HEADLINES:-

1. Naktuk atanga ram puma thil hrang hranga goods & services tax (GST) tih hniam a nih dawn avangin Mizorama lirthei zuartute an lun hle.
2. Mamit district-ah chawlhkar 2 kar 3 vel kal ta atang khan khaw engmawzatah sazu a puang mek.
3. Election Commission of India (ECI)-in ram pum huapa political party a ziahluh zingah Mizoram ami party 2 a paih tel ve.
4. Prime Minister Narendra Modi-a'n GST lak dan thar, GST 2.0 chu ramchhung mitin tan hamthatna tur a ni, a ti.

<><><>

GST

Naktuk atanga ram puma thil hrang hranga goods & services tax (GST) tih hniam a nih dawn avangin Mizorama lirthei zuartute an lun hle.

Mizorama Hyundai car zuartu lian CK Hyundai neitu Pu Joseph Lalchhanhima chuan Hyundai car chu hauh lawk an tam hrim hrim bakah tun hnai-ah hian GST rate a tlawm dawn tih hria-in hauh lawk an tam zual niin a sawi a. Tunah hian Hyundai car hi 130 atanga 140 vel an kawl mek tih a sawi bawk. An car tha leh man to, cheng nuai 30 man bawr vel, Hyundai Tucson chu cheng nuai 2 chuanga a man a tlakhniam dawn avangin hauh lawktu an pung hle niin Pu Joseph Lalchhanhima chuan Akashvani Aizawl a hrilh a. Hyundai Verna pawh hauh lawk an tam thu a sawi. Anmahni lamin sawi darh chiam lo mah se September ni 22 atanga thil engemawzat a GST rate hniam tur hi hria an tam avangin hauh lawktu an pung a ni a ti a ,ram chhunga hralh kal ber zinga lang pha Hyundai Exter pawh Rs. 65,000 leh Rs 70,000 inkarin a tlawm dawn tih a sawi bawk.

Hetih lai hian GST tlak hniam vangin Toyota car chi hrang hrangte pawh a man a tla hniam vek a, heng a man tlak hniamna zat tur hi tih fel tawh a nih avangin a tlawmna zat ang hian tunah ZoteToyota, Chanmari West, Sairang Road ah an hauh lawk mek a. Zote Toyota hotute'n an sawi danin Toyota Car Land Cruiser pheih chu a man hmasa aiin Nuai 16 chuangin a tla hniam a, heng car man te hi class tinah a danglam thung a. Car hrang hrang hi a tlawmna zat erawh a inang lo a, a hma lama a manah a inngnat niin an sawi.

Car man a GST tihhniam hi India-ah hian car pianzia leh an chak zawng atangin teh a ni a, Car (petrol hmang chi cc 1,200 leh diesel cc 1500 metre 4 chin hnuai lam chu GST hi za zela 18 lak a ni tawh dawn a, a hma chuan za zela 28 chuang lak thin a ni.

<><><>

QUADRANGULAR CONTEST

Dampa assembly biala inthlan that lo awm tur chu kil li atanga chuh a ni dawn ta-in a lang.

BJP-in hemi biala hun laklawha inthlan that (by-election) lo awm tur atana Zirtawpni zana an party candidate tur an puan tak hnu-ah he lai bial inthlan thatna chuh tur hming 4 puan a ni tawh a. A puang hnunung ber BJP hian Pu Lalhmingthanga Sailo chu Dampa bial chuhtu

tur a nih thu Delhi a an hmunpui atangin an rawn puang a. Pu Lalhmingthanga hian kum 2008 assembly inthlan khan ZNP hminga chuhin a tling zo tawh lova. Kum 2023 inthlanah khan ZPM-in an dintir loh avangin Congress zawmin Congress candidate in a ding a, a tling zo lo leh bawk.

Rorellai party ZPM chuan kum 2023 assembly inthlana an party candidate tling zo ta lo Pu Vanlalsailova bawk an dintir leh dawn a. MNF chuan he lai biala MLA ni lai, August ni 21 a thi ta Pu Lalrintluanga Sailo bial hum turin an party senior vice president, minister hlui Dr. R. Lalthangliana an dah a. Congress party chuan minister hlui Pu John Rotluangliana an dintir dawn bawk a ni. PC Party president Pu Vanlalruata chuan an party-in Dampa assembly bial inthlan that hi an chuh dawn leh dawn loh an la ngaihtuah rih loh thu Akashvani Aizawl a hrilh ani.

<><><>

RODENT

Lunglei district khaw pahniha nasa taka sazu a puan hnu-ah Mamit district-ah pawh chawlhkar 2 kar 3 vel kal ta atang khan khaw engmawzatah sazu a puang mek.

Mamit district agriculture officer (DAO) Pu Ngurrinsanga Sailo hnen atanga Akashvani Aizawl-in thu a dawn danin khawtlang hruiute'n an khaw thlawhhma a sazu puang an rawn sawina-ah department hnathawkte a theih chin chinah an tir deuh zel a. Sazu tur te semin kuthnathawktute hnenah a hman dante an zirtir nghal zel bawk a. Hnathawktute indaih loh avangin khaw thenkhatah chuan an VC-te hnenah sazu tur thawn an awm bawk. Hriat theih chinah he'ng khua-ahte hian sazu a puang tih report an dawn bawhzui-in sazu tur an sem a. Phuldungsei, Kawnmawi, Lallen, Saithah, Rulpuihlum, Khawrihnim, Reiek, Lungphun, Kangmun, South Sabual, Hmunpui, Pukzing, West Phaileng, Parvatui leh Pukzing vengthar khua-ah te loneitute hnenah sazu tur hi sem a ni tawh a ni.

Kumin hi Thingtam kum a ni a, Thingtam hnuehnung ber chu kum 1977 kha a ni a. Mautam ang bawkin kum 48 danah rawthing hi a tam thin a. Rawthing a par a, a rah eitu sazute chu an inthlahpung chak em em a, rawthing rah ei tur a tlem hnu-ah buh leh thlai lamah an tuan ta thin niin mithiamte chuan an sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

ECI – RUPP

Election Commission of India (ECI)-in ram pum huap leh state hrang hranga Registered Unrecognised Political Parties (RUPP) a thenfai mek zingah Mizoram ami 2 an tel ve.

RUPP te hi ECI-in political party a a pawmpui la ni lo, mahse, inziaklut site an ni a. Election Commission-in kar kalta mai khan RUPP 474 zet chu a paih tawh a. Hemi zingah hian Mizoram political party zinga election commission a inziaklut 2 - Hmar People's Convention (HPC) leh

Maraland Democratic Front (MDF) te chu paih zingah an tel. HPC hi la ding reng mah se inthlanna-ah an party hminga chuh lovin party dang nena thawkhovin HPC candidate te chu independent angin kum rei tak an lo ding tawh a, inthlanna a an party hminga an chuh loh rei avangin paih a ni a. MDF hi awmze nei a inthlan a hmachhawn ngai lohna a rei tawh bawh avangin paih a ni bawh. He tih lai hian an party mal hminga inthlanna chu khat tak, People's Conference (PC) party erawh chu kum 2024 a Lok Sabha inthlanpui a candidate an neih ve leh zauh avang khan an la him rih ni a hriat a ni.

ECI chuan Representation of the People Act 1951 tlawhchhanin an tihtur pawimawh ber inthlanna kum 6 chhung chuh tawh lo registered unrecognised political party-te chu a thianfai mek a. Kar kal ta Ningani (September ni 18) khan RUPP 474 a paih bakah hian a hma-in RUPP 334 chu August ni 9 khan a lo paih tawh bawh a. Kar kalta Ningani a an paih zingah hian HPC leh MDF hi an tel ve a, an rual hian Uttar Pradesh-ah pheih chuan political party 121 zet paih an ni a. Thla 2 chhunga political party a paih zawng zawng zat hi 808 a tling tawh a ni.

Hei bakah hian state 23 a political party 359-te chu inthlanna chuh mah se an sum hman dan tangka kum 3 chhung zet ECI-a an thehluh tawh loh avangin paih theih dinhmunah an ding mek a. ECI chuan he'ng political party-te awmna state a chief electoral officer (CEO)-te chu an dinhmun thlithlai turin a hriattir tawh hlawm a ni.

<><><>

CAG: SOLID WASTE

Comptroller & Auditor General of India (CAG) report hnunung ber chuan Mizoram khawpui thenkhata bawlhhlawh senghawi dan chu mihring tan a hlauhawm hle niin a sawi.

CAG report chuan Mizoram khawpui thenkhat a bawhhlawh chi hrang hrang paih leh senghawi dan chuan mihring hriselna a khawih chhiat theih bakah boruak tichhia-in ram leilung chhiatna bakah tui leh thing leh mau leh nungcha thlengin dinhmun hlauhawma a dintir niin a sawi a. Solid Waste Management Rules, 2016-ah chuan bawlhhlawh chi hrang hrang sawngbawl tura a lakkhawm, then hran, dahkhawm, phurh sawn leh paih dan tur fel taka ziahlan a ni a. CAG audit atanga a lan dan chuan Solid Waste Management Rules 2016 hian khawpui hrang hrangah zawm a hlawh lo nasa hle a. Bawhhlawh senghawi dan hi a him lovin a nih dan tur anga kalpui a ni lova, a senghawi hnathawktute himna tur ngaihthah a nih bakah sum leh pai hman dan pawh a lang tlang lovin mawhphurtu awm lo ang mai a ni, tih a ni.

CAG report chuan bawlhhlawh tlingkhawm zat hi a bukna (weighbridge) a awm loh avangin a hriat theih lohva. Bawlhhlawh zat hriat theih a nih loh avangin a senghawi dan tur fel taka duan theih a ni lo ati a, bawlhhlawh tling khawm awmze nei a thliar hran a awm lova, bawlhhlawh phur lirtheite pawh khuh lohin an tlan mai a, endik turin GPS hman a ni hek lo. Aizawl khawpui-ah pawh bawlhhlawh senghawi dan tur dik tak anga kalpui a awm lova Lunglei leh Lawngtlai khawpui-ah te pheih chuan a paihna hmun bik ruahmanna a felhlel hle. He'ng khawpui pathumah te hian a tihdan tur anga sawngbawl lohva pawn lera bawlhhlawh paih mai mai a nih bakah hmun thenkhat pheih chuan an hal khu vut vut mai a ni.

<><><>

PM

Prime Minister Narendra Modi-a'n Goods & Services Tax lak dan thar, GST 2.0 chu ramchhung mitin tan hamthatna tur a ni, a ti. Vawiin tlaia ram mipuite hnena thuchah a sawiah Prime Minister chuan GST tih hniam tur chu ram mipuite phurrit, nasa taka chhawk zangkhaitu tur a ni, a ti a, chhiah lak dan, zaa 5 leh zaa 18 chauh l a nih tawh dawn avangin nitin mamawh chi hrang hrang deuh thaw man a tlahniam dawn tih sawiin ei tur lam chi te, damdawi, sahbawn, brush, paste, health leh life insurance-te bakah thil chi hrang hrangte chu chhiah lak lohna emaw a awm pawhin zaa 5 chauh a awm tawh ang, a ti a, chhiah zaa 12 lak thinna thil chi hrang hrang zinga zaa 99 chu tunah chuan zaa 5 chauh chhiah a awm tawh dawn a ni, a ti.

<><><>